

# Ilis amis da la litteratura s'engaschan

L'Uniun per la litteratura rumantscha ha preschentà sias activitads

■ (anr/ac) **Flavia Hobi rempiazza Dumenic Andry en la suprastanza, l'avegnir da La Quotidiana ha procurà per ina animada discussiun ed il litterat bernais Beat Sterchi ha referi e delectà ils preschents. Quai èn stads ils puncts culminants da la radunanza generala da l'Uniun per la litteratura rumantscha la sonda passada a Cuira.** Betg main che 106 commembras e commembers dumbrà l'Uniun per la litteratura rumantscha e 333 amias ed amis sin la nova preschientscha da l'uniun sin facebook. Ina gronda raspada n'ha dentant betg chattà la sonda passada la via en la chasa rumantscha a Cuira a la radunanza da l'uniun. Ils preschents n'èn dentant betg vegnids unifsads a la scuntrada annuala dals auturs ed amis da la litteratura rumantscha. La presidenta da l'uniun, *Viola Pfeiffer*, ha timunà per l'emprima giada la radunanza ed ella ha fatg quai cumpetent e cun anim. La presidenta ha pudì preschentar a la radunanza ina candidata per il suprastant partent *Dumenic Andry*. *Flavia Hobi* è vegnida elegida cun applaus e quai vala medemamain per ils ulteriurs commembers da la suprastanza. I sa tracta sper la presidenta *Viola Pfeiffer* da *Benedetto Vigne* e *Walter Rosseli*. Las finanzas da l'uniun sa preschentan en in bun stan grazia a pli grondas donaziuns, uschia che l'uniun vul puspet lantschar da

nov lavuratoris da scriver. Sper ils arranschaments enconuschents sco il punct dubel e la Litteratura che cumpara per la 36avla giada. *Silvana Derungs* ha fatg attent a la tematica da la proxima Litteratura ch'envida auturas ed auturs da sa fatschentar cun atgnas u biografias fictivas. Il temp per inoltrar texts biografics u da tut auter gener dura enfin ils 12 da zercladur. Cun sia tematica sa drizza la Litteratura in pau als proxims Dis da litteratura dals 3 enfin ils 6 da november 2017 e che sa numnan per quella giada Gieus da litteratura.

## Quo vadis Quotidiana?

Il giavisch da discutir l'avegnir da la gasetta rumantscha dal di è vegnì gist da pliras varts dals preschents a la radunanza da l'Uniun per la litteratura rumantscha. Ilis amis da la litteratura ed auturas ed auturs èn pertscharts da la muntada dal pled scrit per la lingua rumantscha. Ed els èn vinavant pertscharts da las midadas generalas en il sector da las medias da print. Dad ina vart è vegnì punctuà la valur simbolica dad ina gasetta quotidiana rumantscha e dad in signal completamain fauss sche quel simbol avess da svanir. Discutadas èn vegnidas variantas digitalas ed ediziuns squitschadas sulet emnilas ed auter, senza dentant pudair



**Beat Sterchi ha delectà la sonda passada a Cuira cun sia virtuosità linguistica e cun ses fin umor.**

FOTO A. CADONAU

stipular la soluziun ideala. La finfinala è sa rinforzada l'opiniun da la necessitad da mantegnair e cuntinuar cun la suletta gasetta rumantscha dal di. La dumonda

resta dentant co? E l'Uniun per la litteratura rumantscha vul far valair sia opiniun en chaussa e vul tshertgar en questa dumonda il contact cun la Lia Rumantscha.

## Tudestg da scrittira e dialect fatschentan il litterat Beat Sterchi

*Beat Sterchi*, autur da prosa, da teater e scrivent da reportaschas, viva a Berna ed ha visità la sonda passada la chasa rumantscha per delectar ils preschents cun diversas prelecziuns ord sia atgna ovra. Sterchi ha er explitgà sias stentas per dar al pled discurre, en ses cas personal il dialect bernais, dapli paisa. La situaziun linguistica dal tudestg en Svizra è gist cuntraria a la situaziun rumantscha. Qua gioga l'idiom la rolla principala en la scripziun ed il rumantsch grischun sto batter per sia reputaziun. En la Svizra tudestga gioga il tudestg da scrittira la rolla principala ed il dialect vegn, tenor Sterchi, negligì. L'autur bernais ha dentant punctuà la valur dal tudestg da scrittira ch'el na veglia insumma betg snegar. E betg tut quai che vegnia scrit en il dialect tudestg saja per se bun. Dentant pledescha Sterchi per dapli curaschi da s'exprimer tenor las abilitads orales e da betg sfurzar ina expressiun verbala per tudestg da scrittira che saja per il Svizzer da lieunga tudestga la finfinala ina lingua estra. Las prelecziuns da Sterchi en tudestg da scrittira e dialect èn stadas perdigda da la virtuosità perschudenta da l'autur e quai en omaduas variantas linguistics.